

Date – 01/11/2025

Time - 7:30 Hrs

HEADLINES (MORNING)

1. Aizawl khawpui chhung kawngpui te chu siamthat tan a ni.
2. Land Revenue & Settlement Department, Pu B. Lalhhanzovan nimin khan Hnahthial Deputy Commissioner Office-ah Revenue Office a hawng.
3. Prime Minister Narendra Modia chuan vawiin hian Chhatisgarh state dincham kum 25 na a hmanpui dawn.
4. Defence Minister Rajnath Singh-a chuan vawiin hian ASEAN Defence Ministers' Meeting Plus (ADMM-Plus) vawi 12 na Malaysia- Kuala Lumpur-a neihah a tel dawn

<><><>

AIZAWL ROADS REPAIR

Aizawl khawpui chhung kawngpui te chu siamthat tan a ni a, Ningani zan khan PWD Minister Pu Vanlalhlana'n kawngpui siamthat hnathawh tan chu a hmunah a enfiah.

PWD Minister chuan, kawngpui siam chu election manifesto-ah an nei a, Kawng tha neih chu sorkar duh dana nih bawk avangin uluk takin kawngpui siamthat chu an endik dawn a ti. Pu Vanlalhlana chuan, tunhma deuh atang khan October ni 30-ah bul tan chat an tum chu a takin an ti ta a, chutiang tur chuan contractor pawh ni 30-a bul tan chat thei turin an rawn inruahman a, nizanah hian bul an tan ta tih sawiin, mipuiin kawngpui tha an nei tur a ni tih chu an duh dan a nih thu a sawi. Pu Vanlalhlana chuan, official-te mai bakah Local Council leh NGO te chu kawngpui siam a that theih nan a chhah lam te, temperature dik tak a ni em tih te leh a quality te pawh engtik lai pawhin an endik dawn a ni, a ti a. Kawng tha an neihna tur chuan tunhma ang lo deuh hlekin an kalpui dawn a, a quality-ah hian mipui pawh an khirh em em dawn tih hnathawktute a hriattir bakah lung pawh a chang tha deuh hmang turin a hriattir a, mipui pawhin kawng siam chhunga harsatna an tawh a nih pawhin lo dawh hram hram turin a ngen bawh a ni.

<><><>

EDUCATION MINISTER

School Education leh Higher & Technical Education (H&TE) etc Minister Dr. Vanlalhlana chuan nimin khan Govt. Kolasib College a tlawh a, College Seminar Hall-ah zirtirtute leh staff-te inkawmhona hun a neihpui a, Minister hi Dy Speaker Pu Lalfamkima'n a tawiawm.

Dr. Vanlalhlana chuan, College zirtirtute chu an hna pawimawh zia hria a, an eizawna dah hmasa ber turin a chah a. College zirtirtute hah zia leh inpek zia a hriatpui thu sawiin, kar khatah period sawm chuang te an nei a, class room piah lamah co-curricular activities tam tak an nei leh bawh thin a ni, a ti.

Minister chuan, zirna chu a kal ngaiin a kal reng dawn a, chuvangin zirna ngawr ngawr piah lam thlir thiam a pawimawh thu a sawi a. New Education Policy (NEP) kal zelah Skill Enhancement Course-te chu tangkai zawka hman a pawimawh dawn tih sawiin, Skill enhancement chu School Education te nen pawha an tan dun a, kal ho dan tur an ngaihtuah thiam a ngai a ni, a ti. Skill thain mi tam tak a vawrh san tawh thu amah ngei pawhin a hmuh nual tawh thu a sawi bawh.

Zirna tha zawk neih a nih theih nan ruahmanna thar siam a nih tur thu sawiin, Minister chuan zirtirtute assessment neih a nih tur thu a sawi a. "IQAC kal tlangin, confidential takin zirlaite'n an zirtirtute an endik dawn a ni," a ti. Sawrkar kalphung thar ah advertisement tello a hna lak a awm loh thu leh qualified-lo chu lak loh an nih thu a tarlang bawh.

Inkawmhona hun hi Govt. Kolasib College Principal Pu Laltanpuia Rengsi-in a kaihuai a. Thusawi tawi neiin, casual teaching faculty an pek avanga lawmthu a sawi a. New Education Policy (NEP) in a course thenkhat a ken tel avanga zirtirtu indaihlohna leh non-teaching administrative staff an indaih loh thu te Minister hnenah hian a thlen bawh.

<><><>

HNAHTHIAL REVENUE OFFICE

Minister of State for Land Revenue & Settlement Department, Pu B. Lalchhanzovan
nimin khan Hnahthial Deputy Commissioner Office-ah Revenue Office a hawng.

Minister chuan hawwna thusawiin Licensed Surveyor nei turin hma an la mek a ti a,
Licensed Surveyor-te chu ram teh leh a tul apiangah, rate mumal tak nena chhawr an nih
tur thu a tarlang a. Heng licensed surveyor leh empanneled firm 13 an chhawr mekte hian
indaihlohna tam tak an phuhruk a beisei thu a sawi a ni.

Hnahthial tan Revenue quarter sak mek a ni a ti bawk a, Online File Tracking
System, mahni awm hmun atanga File thlen chin hriat theihna tur chu bawhzui mek niin
hei hian File hup bo, File tang leh tih bo tam lutuk a tihreh an beisei thu a sawi a ni.

Hei bakah hian mipui dawrtute tan Customer Care Policy an duan mek thu a sawi a.
Chutih rual chuan mipuite pawh thawktute ngaichang thiam, tul lova tibuai chhen thin lo
thin turin a chah a. He Revenue Office, Hnahthial District tana hawn tak chu mipuite leh a
thawktute hnenah neitu rilru pu chung a lo enkawl turin a chah a ni.

Minister chuan State dangin an ngaih pawimawh deuh pakhat chu District Land
Revenue a nih thu leh chu chu Mizoram tan ngat pheh chuan sum hai luhna pawimawh tak
a ni a ti a, churang chuan mumal zawka chhiah lak luh a nih theih nan Land Revenue
reforms siam turin tunah dan thar an ennawn mek thu a tarlang.

He hun hi MLA, Pu Jeje Lalpekhlua pawhin a hmanpui a, Inkhawm ah hian
Revenue Secy Pu Vanlalmawia chuan Revenue Office chu District Administration nen
chak taka thawh ho tir an tum thu a tarlang a. Churang chuan District thar pathumah chuan
Revenue Office hran awm tawh lovin DC office-ah beh tir an ni tawh ang a ti a, ram
chungchanga buaina tam tak awm thin chu a chinfel nan Revenue Court mumal tak nei tura
rilru sen mek a nih thu tarlangin Settlement Officer (SO) chu Assistant Commissioner (AC)
ti a hming thlak turin an buaipui mek thu a tarlang bawk. Hnahthial Revenue Office ah hian
post 4 :- Surveyor-1, LDC, Revenue Assistance leh Surveyor post chauh hnawh khah rih a
ni a. Settlement Officer (SO) charge hi Addl. DC, Pu Zothanmawia Khiamte chuan a la a
ni.

<><><>

SCHOOL EDUCATION MINISTER

School Education & ICT Minister, Dr. Vanlalhlalan ninmin khan Vairengte ah
Taxation Data Collection Centre leh School pali a tlawh. Minister hian Vairengte a pan
hma hian Kolasib-a Deputy Commissioner of State Tax, Kolasib Zone Office chu a tlawh
hmasa a. Heta thawktute chu fuihin, theihtawp an chhuah tlan chuan Tax revenue tun aia
tam an hmuh theih ngei a beisei thu a sawi. Taxation Office-a thawktute hian Minister
hnenah hian Kolasib Zone a an hmalakna hrang hrangte lo hrilh in , Kolasib hnaih a Tax
inspection point awm thei se an duh thu leh an mamawh dangte an thlen.

Kolasib atang hian Minister hian Vairengte pan nghalin, Govt. Vairengte PS-VII,
Govt. Vairengte High School, St Henry School leh Govt. Vairengte Higher Secondary
School te a tlawh a. Heng school a tlawhnaah hian thawktuten Minister hnenah hian an
mamawh leh indaihlohna te an lo thlen nghal a ni.

School a tlawh zawhin, Vairengte a Taxation Data Collection Centre tlawh in Dr.
Vanlalhlalan chuan chhiah luh that tawh loh chhan zinga langsar zual te a tarlang a, "Tax
pumpelna chi hrang hrang - Vairam atanga thil lei, Mizorama rawn hralh leh si ,
amaherawhchu vairam a tax pe si te, Mizorama thil hralh, Mizorama hralh ang ni lova ziah
te leh tax pumpelna kawng tam tak a awm thin a ni," a ti a. Hemi piahlamah hian,
engtiangin nge tun aia chak zawk leh tam zawka tax collection tihpun a nih theih ang tih
chu a ngaih pawimawh a nih thu a sawi bawk.

<><><>

GST REFORMS

India ram puma GST rate thar hman tan tura tih a nih hnuah bungraw tam zawkah
GST rate tih hniam a ni ta a, Mizoram-ah pawh GST registration nei sumdawngte'n GST
rate hniam takna bungruate chu a man an ti hniam tan ta a.

GST thar, September thla atanga hman tan ah hian agriculture lam kaihhnawih thil
tam tak, a bikin hmanrua leh bungrua te chu a man tihhniam a ni a, hei hian
kuthnathawktu'n hmanraw man an senso tur a titem in hmanraw changkawng zawk hman a
nih theihn nan kawng awlsam zawk a siamsak ngei beisei a ni.

Kuthnathawktute hmanraw thenkhat htiller, sprayer,diesel engine, buhherna khawl,composting machine, harvesting machinery te leh tractor te chu zaa 12 atangin zaa 5 ah a tlahniam a, leitha siamna bungrua hrang hrang te leh tui thehna hmanrua (drip irrigation leh sprinklers) te pawh zaa 12 atanga zaa 5 ah a tlahniam a ni. Heng bakah hian bungraw phur motor truck leh delivery van ang chi ah pawh GST chu zaa 28 atanga zaa 18 ah tihniam a ni a, hei hian thlai thar hralhna kawngah senso a tlem theih beisei a ni.

Aizawl bik ah chuan dawr thenkhat te chuan an bungraw tam zawk chu tax exempted an nih tawh sa avangin danglamna a thlen tam lem lo niin an sawi a, GST thar hman a nih hma pawh khan kuthnathawktute lei phak turin an bunngrua te chu man man zawka an hralh thin thu an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

PM IN CHHATISGARH

Prime Minister Narendra Modia chuan vawiin hian Chhatisgarh state dincham kum 25 na a hmanpui dawn. Pu Modia hian Chhatisgarh-a a cham chhungin hmasawonna project cheng vaibelchhe 14260 man a hawng dawn bawk a ni. Pu Modia hian naupang lung tha lo gift of Life programme hnuaia enkawl 2500 te nen hun an hman dawn bawk a. Chhatisgarh Legislative Assembly-a Prime Minister hlui Atal Bihari Vajpayee-a lim a tlangzarh dawn bawk a ni.

<><><>

DEFENCE MINISTER

Defence Minister Rajnath Singh-a chuan vawiin hian ASEAN Defence Ministers' Meeting Plus (ADMM-Plus) vawi 12 na Malaysia- Kuala Lumpur-a neihah a tel dawn a. He hunah hian kum 15 chhung ASEAN te nena thawhdunna chungchang a sawi dawn a ni.

Nimin khan Defence Minister Rajnath Singh-a chuan India-ASEAN Defence Minister Meeting ah maritime security chu an thawhhona pawimawh tak anih thu a sawi a. Pu Singha chuan ASEAN Member ten ASEAN-India Maritime Exercise vawi hnihna neih an remti chu lawmawm a tih thu a sawi a. Maritime security chu ramin a ngaihpawimawh berte zing ami a nih thu a sawi a ni.

<><><>

PM

Prime Minister Narendra Modia hoin nimin khan Gujarat-a Ekta nagar-ah National Unity Day hman a ni. He hunah hian thusawiin PM Modia chuan khua leh tui zawng zawngte chu ram hmasawonna tura inpumkhat tur leh theihtawp chhuah turin a sawm a. Sardar Vallabhai Patel-a piancham vawi 150-na puala National Unity Day lawmnaah hian PM Modia chuan ramchhunga mipui vaibelchhe telin ram inpumkhatna tura thutiam an lak thu sawiin ram inpumkhatna ti chhe thei ngaihdante paih ngam turin mipuite a sawm bawk a ni. PM Modia chuan kum 2014 hnua sawrkar chuan Naxalism leh Maoist helna ti bo turin nasa takin hma a lak thu a sawi a. Kum 2014 hma kha chuan ramchhunga district 100 chuangah Maoist an che tih sawiin tunah chuan 11 ah a tlahniam tawh hle tih a sawi a ni.

<><><>